

VAN OVER DE IESSEL



juli 2017

met in disse editie:

- *'Yoga' van Diny Kloek*
- *'De stok' van Corry Overmars*
- *'Cirkels' van Mineke Mollink*
- *'Lindebloesem' van Diny Groothalle en:*
- **Bert Wolbert : Onder 'n droad deur vretten.**

Colofon

•Joargaank 08, Nummer 03

•Utgave: 1 juli 2017

•Deur: SchrieversBond Overijssel

Redactie:

- Henk Vos
- Riek van der Wulp
- Lo van der Wulp

Redactieadres: riekenlo@chello.nl (Riek en Lo van der Wulp)

Lay-out: Diny Kloek en Alien Valk

Foto's: Riek van der Wulp en Diny Kloek
of een bi-jdreage van de auteur

Volgende editie: 01-10-2017



Inhold

titel	schriever	bladzijde
Veurblad		1
Colofon		2
Inhold		3
Van de redactie	Henk Vos	4
Cirkels	Mineke Mollink	5
Noar Noorwegen	Henk Hooijer	6
Strip: Meneer Achterkamp	Kampman en Mollink	7
Lindebloesem	Diny Groothalle	8
Gaanzenoaverlast	Fenny Martens	9
150 woorden –	Femmie Woltman	10
Kump een man bi-j de dokter	Femmie Woltman	11
Flierefluiter	Henk Vos	12
Yoga	Dinie Kloek	13
Dree vassies	Mineke Mollink	14
De stok	Corry Overmars	15
Suja... suja... kiendtien...		18
Lange, leste verael... -De gemientevlage-	Riek van der Wulp	19

Van de redactie...

Vakaantied

As lid van de redactie kan ik mi-j veurstelln dat de lezers van “vanoverdeissel” al weer uut hebt e-keken noar de volgende oflevering van disse digitale kraante . Een oflevering met weer allerhaande verhaalties, gedichies en niet te vergeten de foto’s die er iedere keer weer bi-j stoat.

E-maakt en an è-leverd deur de verschillende fotografen die ze bi-j de desbetreffende verhaalties plaatst.

Altied maar weer eem zuken noar de geschikte sfeer of wat dan ook um weer te geem wat er in de schrieveri-je stiet.

En dat is disse keer wel weer redelijk gelukt. En dat is mooi met è-neum want as ie de kraante uutprint en in de koffer stopt as ie op vakaantie goat dan heb ie nog wat te doen.

Maar gewoon achter et huus in et zunnegie as die er is mag ök.

De dialectschrievers hebt weer op è-schreem wat ze in gedachten kwam, pas geleen of al wat eerder op papier è-zet.

En dan krieg ie verhaaln over mensen die met et vliegtuug goat en aandern die met een stok mut lopen.

En dat een gemeentevlagge niet zomaar iets is um in de gemeenteroad rap over te beslissen.

Ku-j hier ök lezen. Een vogel die aandere vogels noa dut, woar heb ik dat over mensen ök wel is heurt.

Een man die noar de dokter giet umme road mar eigenlijk niet kreg.

En dat yoga ök vermuiend kan wezen wus ik eigenlijk niet, ik dacht dat ze doar een bectie veur zich uut zaten te staarn.

Al met al weer een mengelmoes van onderwarpen die de redactie bin è-kregen hef.

Veul lees en kiekplezier.

Namens de redactie:

Henk Vos.



De provincie Overijssel ef ook dit joor weer een skriefwedstried uut'eskreven met et thema:

'Overijssel verwoord'

Gelukkig was door ook ruimte veur de streektael en wi-j bin dan ook bliede dat Bert Wolbert uut Oldenzaal, lid van onze 'Schrieversbond Overijssel', de pries, wat et onderdiel streektael betræft, ewunnen ef. Wi-j willen Bert van ærte feliciteren en vienden et fijn dat ie et verael noar ons toe'estuurd ef.

Ieronder ku-j et lezen. Geniet d'r van!



Onder 'n droad deur vretten

De navigatie zer dat ze op de rotonde rechtsof mos en dan duur het doarp Beuningen hen. Jolanda was der nog nooit west.

Dan verdan op het Beuninger Achterveld an want doar har ze ofsprökken met Huub.

Bie de Schoapskooi Stroothuizen, milden in 'n natuurgebied, har Huub zegd, doar kön wie mekaar wal zeen zounder dat kunnigheid ouns zöt. Zee parkeerden ear Fiat cabrio F124 Spider in de kluur 'Azzuro Italia' nöast 'n griezen Opel Kadett van Huub en woonderen zich der oaver wat hier was bouwd.

Onderwiel zee 't earf op löap lachen ne greune specht ear too. Huub stun in zien 'casual outfit', zoa kenden zee hem nich, an 'n raand van het terras te kieken noar de schöap dee doar löapen te gröazen. Doo hee Jolanda zag kommen kwam hee ear temeut en kussen ear leeflik en ie zaggen an de lichaamstaal van beaden dat ze het meanden.

In het dagelijks leaven wadden ze collega's bie de rechtbaank in Almelo. Jolanda was doar rechter, specialiseerd in bestuursrecht en Huub döa de kantine. Vuur de boetenwereld ne onmeugelijke leefde, mer het was nich anders. Zee zochten an 'n raand van het terras ne stie, doar woar de schöap en de springerigge lämmer het grös ofkauwden. Onderwiel Jolanda vuur ear beaden ne lunch bestöl wörden Huub ziene aandacht trökken duur 'n schoapenram dat zich rekken um onder 'n droad deur te vretten. Greanzen opzeuken, joa dat döaden zee ok. Huub mos der um glimlachen.

Ok Sharon was der op dissen mooien vuurjoarsdag op oet trökken um vuur de kraant wat foto's te scheten vuur ne extra veurjoarseditie dee oaver veerteen dagen as bieloage zol oetkommen. Ze was freelance fotograaf en har disse opdracht binnen haald. Op het earf van de Schoapskooi schöat ze pleatkes van 'n natuur dee disse dagen duur het mooie weer op springen stun. De lämmer wadden doarbie 'n dankbaar onderwearp. Mer ok van de leu op het terras en de keender bie de schöap maakten ze mooie foto's. Sharon har der oardigheid an.

Völ wille hadden Jolanda en Huub an het kleane jöngske van good twee joar dat prebeerden met 'n fuske grös 'n lam an te halen. Mer het nöchtere dear har der weanig fedusie in.

Huub, met 'n aarm um Jolanda hen was evven stil.

Dit was 'n mooi beeld, mer het maakten het hem ok verdreetig. Wat har hee toch geern keender had, mer Thea wol het nich en woarum, dat was hem nooit dudelijk wörden. In hoes döa ze doaroover het zwiegen.

En now har hee alweer bienoa 'n joar ne stille leefde met Jolanda. Geneen wus het.

En toch mos hee der in hoes wal 'n moal met vuur 'n droad kommen. Thea was nich makkelijk. Doarenteggen Jolande wol geern met hem verdan.

Duur nen kus van Jolanda op ziene wang kwam hee weer tot zien verstaand.

Het was veerteen dagen later, Huub zat in hoes vuur het raam in het niks noar boeten te kieken en was met ziene gedachten bie Jolanda en den dag doo zee zoa geneugelijk bie de Schoapskooi hadden zetten. Het was now reagenachtig en koald weer, ie zolden der gramsteurig van wörden. Het was nich aandere.

Thea zer ok al niks. Zee zat in ear dreaistool met 'n rug noar hem too de kraant te leazen. Vanoet het niks kwam der nen onwiezen schreeuw, Thea smeeet de kraant opziet, beet Huub too 'doe droadneagel, ik har 't aait wal dacht', stun op, trök 'n jas an en smeeet de deur achter zich too.

Bert Wolbert -Oldenzaal-

Cirkels

*D'r is zovölle gebeurid
Ma d'r is niks veraenderd
Want
Den diek den lig 't er nog en die hoge weg
En det kruuspunt wiederop ok.*

*He-j fietst op 'n diek met de neuze in de wind
Vuute strak op de pedaal'n
He-j trapt en he-j stampst en 't goonst
Deur zien heufd
Zovölle gebeurid
Ma niks veraenderd...!*

*Want
Den diek lig 't er nog en die hoge weg
En det gevaarlijke kruuspunt wiederop ok!*

Mineke Mollink -Hellendoorn-



Naor Noorwegen.

Ik had die nacht slecht eslaopen. Veur mien gevuul helemaole niet. Het is dan ook niet niks, wij zullen die dag oonze eerste vliegreis maken.

Bij mien zoveulste toiletgang worde ook mien vrouwe wakker.

"Man wat een gedoe maak ie toch," gromde zij, "bin'j zenuwachtig of zo?"

"Nee," zei ik "ik bin niet zenuwachtig. Allent wat spanning."

"Da's 't zölfde," kree'k te heuren.

"Volgens mij hebbe wij alles," zei ik tegen mien vrouwe. Ik stelle veur dat wij maar gaot."

"Nou al," sputterde zij tegen, "man dan binne wij daar toch veul te vrog. Wat mudde wij zolange op dat vliegveld doen?"

"Dat wee'k nog niet," zei ik, "maar wa'k eheurd hebbe, mut daar genug te zien wezen. En dan daarbij - hier of daar - wachten mudde wij toch."

De roetenwissers kunnen het wark bijna niet of. De regen spuulde aover de straote. Belijning was mit gien meugelijkheid meer te zien. Echt lekker deurrieden was d'r dus niet bij.

Waren wij dan toch nog te late vertrökken?

Mien TomTom gaf an dat wij nog 68 kilometer van de eindbestemming ofwaren toen wij van achteren ansleuten bij de eerste file.

"Nee hé, hier al,"kreunde ik.

"Kun'j mij even een pepermuntie angeven?" Vreug ik mien vrouwe.

Maar zij reageerde niet en toen ik opziet keek zag ik, dat zij drok bezig was de verstoorde nachtrust in te halen.

Kalm en rustig zat ze daar te knikkebollen. Ze had duudelijk het volste vertrouwen in mij.

Ik wol dat ik dat ook had!

Een ure later en twintig kilometer verder, was het mij wel duudelijk. Dit gung um niet worden.

Een man in een zwarte Volvo waar ik al kilometers laank mit op reed, zat duudelijk béter in zien vel dan ikke. Want ik goed zien dat hij uut volle borst mit de radio mitzung.

Reed hier waarschijnlijk in de baos zien tied. Had niks gien drokte.

Nee, hij niet!

Veul te late kwamen wij an bij het deur mij bespreuken parkeerterrein, wat ook nog ies mijlen ver van Schiphol oflag.

"Verkeerde zuunigheid," beet mien vrouwe - die inmiddels ook allange niet rustig meer was - mij toe.

"Ik breng jullie zo weg," zei een medewerker van het parkeerterrein, met een kwartier komt er nog een stel, kunnen die gelijk mee."

Ik vertelde um dat wij al behoorlijk an de late kaante waren, maar dat meuk gien indruk. Wij hadden nog tied zat volgens um.

Ik was daar beslist niet van aovertuugd, maar wat kun'k doen?

Het scheelde dat wij veur de deure van vertrekhal of ézet worden en dat onze medepassagiers van het taxibussie ervaren reizigers waren, die oons zonder mankeren die juuste balie wussen te wiezen. Aans waren wij nooit op tied ekomen.

Rennen mussen wij. Gien tied umme nog even naar de WC te gaon. Wat ik eigenlijk wel neudig musse.

Mit de haanden baoven 't heufd stund ik even later bij de douane controle. En mien vrouwe stund een paar meter verderop in precies dezelfde holding. Bij oons allebeide had het hokkie waar a'j escand wordt an 'egeven dat nadere inspectie neudig was.

Wussen wij veule da'j oe daar half uut mussen kleden.

Nao weer een paar verleuren minuten muggen wij deur.

"Waar mudde wij precies wezen?" vreug mien vrouwe mij onder het rennen deur.

"Bij Gate B 28" wus ik nog mit muite uut te brengen.

"Waar is dat dan?" wol zij weten.

Abrupt bleef ik staon. Ik had warkelijk gien idee. Misschien leupen wij wel helemaole de verkeerde kaante op.

Van de eerste man die ik ansprak umme mij wegwies te maken, kreeg ik een antwoord, waar ik warkelijk gien touw an vaste kun knuppen. En ook bij de tweede en darde kwam er gien fatsoenlijk woord uut.

Waar waren verdorie de Nederlanders!

"Attentie. Willen de heer en mevrouw Hooijer, reizend naar Noorwegen, zich zo spoedig mogelijk melden bij Gate B 28" heurden wij deur de luudsprekers galmen. O, grote tied dat waren wij. Wij wurden ézócht!

Vanof dat moment was ik helemaole niet zenuwachtig meer, nee die was nou um'eslaone in paniek. Bliende paniek. En niet allent bij mij.

Ik deenke dat d'r niet veule in dat vliegtuug zaten die d'r bliede mit waren, dat de vlucht zo'n tien minuten vertraagd was deur een older echtpaar die te late kwam. Maar wat kunnen wij daar an doen. Wij waren toch vrog genog vertrökken. Dachten wij!

Henk Hooijer -Zwartsluis-





Lindebloesem

**'k Zitte onder 'n lindeboom
heerlijk röstig, lekker loom
um es volop te genieten
van wat der in den boom gebeurt
luster maar,
zoda-j 't goed heurt**

**'n Boom zit boordevol met bloesems
lindebloesems, niet te telln
en van disse lindebloesems
wil ik graag eam wat vertelln**

**Ziej roekt zo ongeleufelijk lekker
en ziej bint zo stralend mooi
da-k geniete met volle teugen
van dit boeket in lentetooi**

**Disse pracht en disse glorie
blif beslist niet onbemarkt
iedere keer mo-w oons verwondern
hoe mooi as de natuur toch warkt**

**Want bij die geurnde, bleujnde bloesems
(zo constateern ik verrast
deur 't onophooldelijke goonzen)
is constant bijenvolk te gast**

**Noe geef ik acht en zie ze warken
het bijenvolk vlög of en an
zie haalt de nectar uut de bloesems
en maakt der mooie raten van**

**Noa al dit kieken en genieten
koop ik noa verloop van tied
bij de imker as beloning
potten vol met golden honing**

Diny Groothalle -Den Ham-

Gaanzenoaverlast

*Den zundag gung ik laanks de Jessel
Oaver het water lea ne waas zo grauww
De boerderien met heur reetn daakn
Diej as ne musse boom de diek uitstaakn
Heur veensterloekn wan gel met blauww.*

*De uuterwaarden leekn week en drassig
Op de akkers zag ik gaanzen goan
Het boernlaand was kaal ewretten
De ganzen bleem doar alns mar etten
Ziej leutn gin sprietje grös doar stoaan.*

*Ik zag ne boer in de uuterwaarden
Miej dunk hi-j was te eande road
Netuurbeheer kan dit zo niet gedoogn
De boer diej zut het an met lede oogn
As de ganzen doar op zien akker goat.*

*Wiej gung vedan doar laanks de Jessel
Bij Olst doar gung wiej het veer
Het reet zag ik op de stroming wieg'n
Teegn de lucht waar ik de ganzen ulieg'n
Al gakkend gung ziej doar tekeer.*

Fenny Martens -Hellendoorn-



Zomerzothheid

Een 150-woorden-veraël van Femmie Woltman.
- Giethoorn -

Men wil beweren dat de Nederlanders meui-jte em-m mit de aardrijkskundige plaatsnaemen en gebieden. Now bin-n er 'Koplopers' die een aandre naeme an de Kop van Overiessel willen geven. Jawel, en dat doen ze zonder medeweten van de bevolking. Dat is toch te zot veur woorden. Verwaacht niet dat die naeme hier op papier wordt ezet, en uutspreken elemaole niet.

Et ef te maeken mit waeter, hoe kan et ook aandere en waor dit gebied zo riekelijk veule van ef. Een extra E, en middenin dat woord een, eufdletter. Stiet sjiek, maar deskundigen zeggen dat dit lariekoek is en taolkundig zinloos.

Die z.g. Koplopers vien-n dat de bewoners now maar rap anleren dat Et laand van Vollenhove en De Kop van Overiessel verleden tied is. Olderwes.

Dit geldverslindend project is een zothheid van de bovenste plaanke.

Ontsierende plakaten vervuilen de ele Kop van Overiessel.

Die ni-je naeme: Gewoon verzoepen!!!



Er komp een man bi-j de dokter

en zegt: "Dokter, kun ie mi'j ook wat geven veur dovigheid. An et rechteroor eur ik minder as an et linkeroot en ik heb mi'j laoten vertellen dat dit een kwestie is van zéniggen (zenuwen).

Dat doen de zéniggen die in joe zitten.

Toen dat tegen mi'j ezegt werd, en mi'j bovendien mitien een goeie raad gaf, e-k daar maar niet zoveule acht op-egeven.

Ik heb de skolders maar opaelt want as dat zo was, as de zéniggen mi'j de baos waren dan was ik wel an beide oren doof, donkt joe dat ook niet dokter?"

De dokter knikt bedaenkelyk en naor de uitdrukking op zien gezichte te oordelen docht hi'j diepe naodaenkt over de vraoge: "Kun ie mi'j hier ook wat veur geven?"

"En hoe hoelange eb ie dit al?"

"Now...ik daenke...wel al een jaor of wat, ja, de tied giet raozend snel dokter en veur a-j 't weten koemen er meer en meer klachten bi'j en ik veule mi-j nog te jonk om mit mankeer older te worden. Ik daenke, hier moet ik dan toch maar ies mee naor de dokter misschien ef die wel een advies en bovendien bin-n er genug pillegies en poeiers in de handel."

Verbaosd kek de dokter de man an.

"Wat zeg ie. Een pillegie veur doofheid, en mit die doofheid daar loop ie al jaoren mit? Waoromme gao ie dan niet eerder naor een dokter toe," valt de dokter em in de rede.

"Och dokter, moe-j lustern. In 't begun was mi'j dat duvels makkelijk en speulde ik er ook wat mit, ik bedoele, as't mi'j niet an stond over hetgeen an mi'j werd verteld dan öl ik et dove oor naor de persoon toe. Nao de zoveulste poging om een verhael of een kwestie an mi'j kwiet te raeken en waorvan ik dan gien sikkepit snapte, dat valt te begriepen, die poging werd dan maar estopt.

Ik aelde dan de skolders op en die beweging e-k mi'j eigen eumeuken. Dat betekend zoveule as, ik begriepe joe niet. Kiek, dat brek mi'j now op.

Mien positie in de maatschappij is in de loop van de jaoren nogal

veraanderd en zodaonig dat ik niks ,maar dan ook niks kan en mag missen wat er zo rondom mi'j gaonde is."

"Now now, ik bin bange dat et al te lange ef eduurd om die zinkens (smerigheid) uut joe'n oor te kriegen. Om de zéniggen de baos te blieven, ja daar kan ik joe wel mit ölpen maar die dovigheid an dat iene oor, dat kan wel ies een langdurige kwestie worden," was de dokter zien menige.

De dokter zit mit de haanden in zien nog forse haorbos en strek van tied tot tied over zien veureufd.

"Wanneer er iene bi'j mi'j komp mit klachten over dovigheid," begon de dokter weer, "dan zet ik meestal de spuite er op en vaeke is dan de ontvanger weer in beste staot .

Maar beste man, die klacht van joe, kan wel ies hardnekkig wezen en ik wil zelfs beweren

dat et angeboren is en et mit de jaoren slummer wordt totdat..."

"Totdat ik elemaole doof word dokter, maar dat is een slecht veuruutzicht.

Och toch, och toch," begon de man te kaarmen. "Hoe mot dat dan verder mit mi'j?"

"Rustig now maar. Op dit moment kan ik niet anders zeggen dat ie de moed maar niet moeten verliezen maar wanneer et blef zo et is, dan moet ie er maar mit leren leven".

"Zeker, zeker dokter, dat begriep ik. Nao jaorenlaank mien geheur te em-m verweerloosd bin ik hiermee knap op de koffie ekeumen maar..." en hier stond de spreker even stille.

"Ik kan et gewoon niet maeken om, gezien mien positie in de maatschappij, de klachten van 't volk te negeren en om dan et dove oor naor et volk te keren. Die gewoonte moet ik zo gauw meugelijk ofleren, dat begriep ik ook wel. Et zal mi-j meui'te kosten, maar wanneer ie er nog een beetie heil inzien dan zol ik zeggen dokter, zet er dan toch eerst de spuite maar op maar dan wel in beide oren en ik zal 't ook drekt maar zeggen dokter, het aandre oor ef al te veule waark edaon en is ook al sleets eworden. Ik bedoele dat ook dat oor niet meer in goeie staot is."

"Dus ook doof bedoel ie. Ja, dat kan veurkoemen. Dan kan dat oor wel

ies oostindisch doof wezen, maar stel joe gerust, hierin stao ie niet alleen. Hier em-m meer meensen laast van en ook heel veule die ,zo ie dat zelf zeggen, een belangrieke positie in de maatschappij em-m. Die beslissingen moeten nemen die er niet omme liegen."

"Is dat zo dokter? Er bin er meer... dan eb ik mi'j veur niks zorgen emeuken.

Niet een ienling maar ja, dit giet mi'j zelf an. Ik geve mien klacht elemaole over in joen aanden dokter. Hoe moet ik verder, et bi'j et olde laoten of de bezzum er deur?"

Hoe dit is of-eleupen? Vanwege zwiegplicht hierover gien verslag.

Femmy Woltman-Groen -Giethoorn-



R

Flierefluiter.

De oalde Klaas dat is een flierefluiter
Hij fluitte al van jongsof heel goed flier
Doarveur is hij dagenlang de boer op
Mar gistern was hij heel toevallig hier.

Wi-j woln dat rare fluiten wel is heurn
Doarveur kwaam wi-j met mekare hier.
Hij deud vreeslijk goed zien beste
Hij flierefluit ök veur zien eig'n plezier

Wi-j gung er eempies is goed veur zitten.
Wie wus hoe lange dat gung duurn
Ik had een klapstoel met è-neum
Ak lange stoa dan kriegt mien voeten kuurn.

Toen 't flierefluiten was gebeurd
leupen wi-j in't donker saam noar huus
Wi-j kun noa 't fluiten heel goed sloopen
Noar flierefluiten lustern is gien kruus.

Henk Vos -Hoogeveen-



Yoga

Met muuite heise ik mij uut berre

Het tikken teegn 't raam veurspelt niet völle goods

Nog loom en sloaperig trek ik de gedienen lös

Zie... net wa-k dache: Een fiene motreagn daalt gestaag near.

Op het kökkendak zit een gieteling zien vearen te schudden.

As -e- mij achter 't veanster zöt beweagen vlög e met een verschrikten schreeuw vot

Nee 't is nog gien lente in Twente!

Met een stieve rugge kröppel ik noar 'n douche. 't Wärme water dat over mij hen spuult dut mij good .

De spieren komt wear een bettie tot leam en ondertussen bedeank ik wat mij vandaag te doen steet.

Moandag: Nee veur mij gien wasdag.

Moandag is yogadag. Deank noe niet da-k zweverig veur mij uut goa zitten staren en mantra's goa zitten mompeln, nee ik doe an aktieve yoga. Het geet um het starker maken van de spieren; een bewust goeie ademhaling en een goeie hoalding

Oons koppeltie oaldere dames wil graag een bettie fit bliem en doar doe-w oons beste veur.

A-k verfrist onder 'n douche vandan komme heur ik manlief ok zuchtend oonze echtelijke sponde verloaten.

Eam later zitte wiej achter een boterham met käse en een köppie thee.

De kraante, den wiej altied earlijk deelt, lig lös e-spreid veur oons.

Wiej et, least, drinkt, en proat oaver wat de kraante oons te vertellen hef.

Dan is 't tied um de boele bij mekaar te pakken veur de yoga.

Een yogamatte um de oefeningen op te doen en een dekkentie um onder te liggen a-j noa al die inspanning, ontspannen magt!

Mien makkelijke outfit he-k vanmorn direkt al an e-trökken.

Zo ik bin der kloar veur!

Half elf

Wiej zit netties kloar op oons mattie in ofwachting van wat oonze yoga juf veur oons in petto hef.

Die juf hef trouwens precies dat lijntje wat ik graag zol willen hebben, mar waar ik nooit van mien leam mear an toe zal komm'n.

Wie magt goan stoan, stevig de voete in de grond (joa, want iej mut "aarden"). En dan mar zweaien met de aarme, noar veuren, noar achtern en doarnoa nog opzied. Dan krie-w een tennisbal en den mu-w onder de linkervoet rollen. Ik rolle tot mij den voet der hete van wödt, dan wödt de ademhaling der bij betrökken: Ears 't ballegie onder 't begin van de hakke en dan: inoademen lichies drukken op de bal, uutoademen en zwoarder drukken op de bal.


**Noa nog wat krachtoefeningen ma-w goan liggen en dat dut arg aangenaam
an mu-k zeggen, want ik zwete onderhaand al oarig van al dat geploeter
Mar ok liggende ku-j nog genug kunsies uuthalen woar a-j de spieren good
van kunt vuulen, veural een dag doarnoa !**

Mar dan is 't toch eindelijk tied veur de eindonspanning.

**Voldoan en loom kroepe wiej onder oonze dekkenties en dreume wiej vot
onder de klanken van muziek die mij an een klaterende waterval dut
deanken.**

**A-k eam later buuten komme, slög een fiene motreagn mij in 't gezichte:
Moandag...**

Diny Kloek -Hellendoorn-



Dree Vassies van Mineke Mollink -Hellendoorn-

D'r was eens 'n klean kindtien det wödden al oarig groot en heur grootmoe die verzuchen: As KLEAN-kind mist 't de boot. Want wiej gif miej computerles en wiej bedient de smartphone? Wie leert hier toch wat van wiej? Is dit nog wèl gewoon?



D'r was eens 'n wicht det vröag an 'n clown: Zeg eens meneertje woarumme kiek iej zo down? Iej heurt toch te lachen met zo'n zunnegien op de wange? A-j zo droevig kiek wörd ik van oe zelfs bange! Toen lachen de clown weer vrolijk noar 't wicht want met 'n zunnegien op de wange bi-j det verplicht.



D'r was een 'n kwestie det zat tussen twee vuren in. Hej mos d'r zelf umme lachen, veural in 't begin. Ma in 't lesten verveel'n 'em det geredetwist en gaf hej zich gewönnen en zea ieskoald: 'k Heb miej vergist.'



De stok.

Ik kenne iemand die met een stok läp. I-j zol bèterof wèen as e een rollater gebruuukt, mar det wil e niet, dan zöt iederiéne em krukkn en det is em de ere te noa. Ik zeeëge teeëng em: "A'j met een rollater goan, dan ku'j ook nog effm goan zitten as det neudig ef, der stiet er ier iéne op de zolder".

Mar nee, i-j wordt niet mú, is zien antwoord. Dus i-j läp met een stok.

Ik eb mi-j de kop gek prakkiseerd woarumme i-j die rollater niet wil gebruuken en ik denke det ik et wete;



Vrogger liep zien opa met een stok en die ad doarbi-j, ook nog een oge oéd op. Det gaf, as et ware een stukken deftig-eid, (denk ik) cachet ièt det in deftige taal. Een rollater gef an, de'j alles niet meer goed kunn, een stok et teeëngdeel.

Dit zol et denk ik, misskien, kun wèen, eel misskien.

Je kun wèl een eleboel met zo'n stok, want i-j drukt de deure der met lös, skäf de gedienn lös, drukt der met op de belle, drukt et licht an, i-j wes dingn an en loat met een tikkien teeëng oen achterste weetn de'j an de kante mun goan.

Die stok zwei-jt nog al ies in 't ronde.

Die stok mut ook een plekkien em want ie kun wel noagoan, woar i-j is, is die stok. Die stok wordt teeëng een kaste ezet of teeëng de mure. Op de toafel elegd of dwars oaver de stoel woar ik op wil gaan zittn.

Vake stiet de stok in et úkien woar as zien elektrishe bzzz/bzzzz leg/hangstoel staat. Die stok ef mar een smalle onderkante, dus alle daang valt die stok wel een keer of wat op de grond, net as de ofstandbedienige die altied op zien boek leg. As e naar de wc mut, valt bi-j toern die ofstandbedienige met een rotklap op de arde vloere. Met völle muuute pakt e'm op of zeg teeëng mi-j: "Pak ie em effm, want nou ik stoa, kump et er zowat uut". En wat döt een mense dan?

Oppakkn want anders e'j nog meer wàrk.

Dan pakt e zien stok. Mar deurdet e oast ef lukt det niet altied en die valt dus ook op de grond.

Ik kriëëge alle daang zowat een àrtverzaking van et lawaai det die stok gef as det dink onverwachts op de vloere klettert.

Je begriepm zeker wel det ik mi-j bi-j toern gruun en gèèl àrgere en enkelt stapel worre van die stok.

Maar... et is ook wel lachn. E'j wel ies een paar mann die stokkn gebruuukn met mekare zien proatn? Nou waart oe dan mar, ie bin oen lèem niet veilig met twie of meer van die stokkn die deur de lucht zwei-jn. Elemaole niet as et oaver voetbal of oaver de politiek goat, want dan bin de zwaain eftiger en groterder.

Dus man met stok? Bliéf mar op gepaste ofstand, as oen lèem oe lief is.

Corry Overmars -Hasselt-



Suja suja kientien...

Enneman, enneman, eulie alen.

Moeder wòr is de flesse?

Achter in de peerdestal

staan d'r een stuk of zesse.

Wat mu-k dan met die flesse doen?

Eulie alen, eulie alen.

Wat mu-k dan met die eulie doen?

Pannekoeken bakken, pannekoeken bakken.

Wat mu-k dan met die pannekoeken doen?

Kientien voeren, kientien voeren.

Wat mu-k dan met det kientien doen?

Wiegen, wiegen,

skup ze det ze vliegen.

Skup ze det ze gapen,

dan wodden et ffinke knapen.

-Kampen-



DE GEMIENTEVLAGE

't Mos dr now eindelijk maer ies van koomn!

Al wel tien joor addn ze dr over eproat, eskærreld en ruzie emaeft

Alle plaesn um eur èn addn dr al iene en zie... zie bleevn alsmaer achter... temeinsn wat disse zaeke betröf: DE VLAGE!

"Iedere gemeente die zichzelf respecteert," zoas de burgemeester zo mooi zee, mos een gemientevlage ebbn en ja... door waarn ze 't ook wel over iens, maer tot een doadwærkelijk ontwærp was 't nog nooit ekoomn.

Veurige weke, toe as de provincie eur ærns presenteerde, addn alle verteegnwoordigers van de gemiente jaloers um eur èn ekeekn, noar al dat kleurige gewapper en dus mosn dr op disse roadsvergaerige spiekers met koppn eslaegn wörn: DIT JOOR ZOL DR EEN VLAGE KOOMN!

"As 't niet kan zoas 't muut, dan muut 't maer zoas 't kan," brengt Koop Burgers van de christelijke kaante noar veurn en iederiene kek verboesd noar um, aandere dut ie zien mond niet lös en now begint ie as eerste?

De burgemeester löt zelfs van verwonderige zien koffielepeltien vaaln en as ie 't op wil pakkn stöt ie lilluk zien eufd an de kop van de linkse wetolder, die um uut wil sloovn en ook net opziet bög um 't lepeltien op te pakkn. Koop skrekt dr'van, kreg een rooie kop en löt um wat onderuutzakkn, i'j ef zien zæggien edoan.

d' Aandere roadsleedn zaegn neks.

In 't verleedn bin dr al zovule woordn over voel emaeft en gieniene wil um now braandn.

De drie rooin, Bærteld, Gæjt en Knelis ebbn eevn oogcontact en alle drie begriepn ze zonder wat te zaegn: GIEN KNUPPEL IN 'T OENDEROKKE GOOIN!

De twee roadsleedn die de democratische pertije verteegnwoordign zittn mooi ræchtop. Frederik van Eelen, de liesteanvoerder, vuult an de knup in zien stropdasse en draeit doorbi'j zien als wat èn en weer. I'j dut dat wel vuuftig keer op een dag, maer ef door zelf gien ærge in.

Zien moat Richard skraept een keer de keel en zæg ook neks.

Peter Köster en Jan Burgers, die allebeidn deur progressieve an'angers ekeuzn bin, ebbn 't vuus te druk met aandere zaekn. Peter telt de plaankn tussn de balkn van de roadzael en Jan tekent allemoale beumpies in de kaantlijn van de roadstukkn, wat niet ærg doelmoatig is, maer wel met de milieubewegenge overien kump.

Netuurlijk öldt niet iederiene zien mond. Dr bin ook roadsleedn zat die eurzelf 't liefste eurn.

d' Anvoerder van de christelijke kaante, Jaansn Kaspers, is dr zoiene. Noa eevn efluusterd te ebbn met Koos Knevel -Koop Burgers zæg toch nooit wat- vrög ie 't woord.

In een gloedvol betoog, met te pas en te onpas dure woordn, prebeert ie dudelijk te maekn dat dr now toch eindelijk ies een vlage muut koomn... maer dat wus iederiene al.

Koos Knevel knekt gedurig en draeit doorbi'j stiewig an zien snörre, die meer dan een christelijke vörm an'eneumn ef. I'j dut zien naeme en pertije dus met ræcht ere an.

Noa een klein ketiertien vælt dr een stilte en de burgemeester wil eigenlijk wel ofsluutn. Misskien kan 't weer een agendapunt wörn veur de volgnde vergaerige?

I'j kreg wat eufdzeerte, de kopstoot is ærder an'ekoomn dan ie dacht. I'j ziet dat de wetolder ook al ies over zien oogn vref, die ef ook een verdachte rooie plække an zien veureufd, wat um as opræchte socialist neks misstiet!

De ruste is um æchter nog niet egund.

Gæjt, die op de twiede plaese an de linkse kaante zit, skettert over de toafel: "Wat zæg Dirk dr eigenlijk van, wi'j ebbn Dirk nog niet eurd...!" Gemaksalve verget ie maer dat zien fractie ook nog gien mond lös edoan ef.

Klein Derkien skrukelt wat ræchterop, i'j liekt wat groter zo. I'j zit ier altied in zien ientien. De lieste "Dörsbelangn" ef um boovnan ezet en umdat meer dan eentiende diel van de stemgeræchtigdn uut de gemiente viendn dat klein Derkien diplomatiek is en een elder oordiel ef, is ie in de road ekoomn. Alles wat ie ier zæg is deurdacht, allienig ef i'j gien ketier neudig umme zien staandpunt uut de doekn te doen. De burgemeester vrög Dirk of ie 't woord wil en i'j knekt. "Ek zaege maer zo, ek zaege maer neks, want a'k wat zaege, zæg ie: Wat zae'j?"

De mondn vaaln lös en alle oogn bin op klein Derkien ericht. Ie eurn de ærsns zowat kraekn, want iederiene is bange dat ie de clou mist. Enkele mondn preveln de woordn van Dirk noa, umme te prebeern dr uut te aeln wat ie bedoelt.

Maer dan giet Dirk værder. "k Eb al iel lange een idee over onze vlage, maer dat zæg 'k now niet. Ek viene dat wi'j de volgende keer as fracties allemoale met een ontwærp muun koomn. Ek, as ienigste verteegnwoordiger van "Dörpsbelangn" zal ook met een veurstel koomn..., maer as leste. 'k Wil now nog neks zaegn, want ie met mekaere zoln 't niet begriepn!"

't Blef stille, d' iene veur d' aandere is bange noa disse woordn met nekszaegnde zinn te koomn. Desondaanks knekt iederiene, dus is 't veurstel an'eneumn.

De burgemeester is bliede dat ie de vergaerige kan sluuatn, dat ie op uus an kan.

I'j is d' ienigste niet!

Dr verloopn een antal weekn en de vlage is 't gespræk van de dag in 't dörp. De achterban van de verskillnde partij'n koomn bi'j eur bestuurders met vanalles andraegn, van kleine kræb-belties op de achterkaante van een enveloppe, tot prachtig uitgevoerde plann. Alle kleurn van de reegnboege wörn noar veurn ebracht en in dank aanvaard. Toch ef ieder roadslid zien eign ideeën over dit onderwærp en wördt 't mieste opzied elægd.

De dag dat 't weer roadsvergaerige zal weezn kump alsmaer dechterbi'j. Gelukkig stet dr niet zovule op de agenda en kan dus 't grootste diel van d' oamnd an dat punt ewijd wörn, woor as iederiene zo mee bezig is.

Al drie ketier vanteveurn zit de publieke tribune vol en stoan dr zelfs meinsn op de gaangk. De pærsbaanke is ook ielemoale bezet.

't Medeleevn is geweldig!

De eerste burger is al lange anwezig en tien roadsleedn zittn al, met dekke dechtgebundn mappn onder eur stoel, an de toafel kloor as klein Derkien binn kump stappn. Uut de diplomaatntasse aelt ie de roadsstukkn en een balpenne en laegt die op toafel, veur as ie giet zittn.

Zie kunn beginn!

"t Iene noa 't andre punt wördt dr deur'aemerd, iederiene kek noar punt neegn uut.

Jan Burgers ef umme de neegn zelfs een mooi bluumpien etekend, i'j öldt 't in stijl.

Socialistische Knelis mos veur de gelegngge skoenn an van zien vrouwe, miestal kwam ie op de klompn. Een strek ad ie niet veur'edoan, dat verdi'jd ie.

De beide kakkerige democraatn ebbn eur veur de twiede keer vandaege nog weer eskeurn.

Richard ef nog een dödegien ziepe achter zien oor, 't is um veur de spiegel ontgoan.

Jaansn Kaspers zit op 't puntien van zien stoel te draein. I'j wil greeg as eerste an 't woord, as iene van de twie wetolders ef ie door ook wel 't ræcht toe, viendt ie zelf.

Dan is punt neegn an de örde.

Vier meinsn steekn d' aand op umme wat te zaegn...

Klein Derkien niet.

"Zullen we om beurten met een voorstel komen?" vrög de burgemeester. "Eerst de christelijke zienswijze, dan de socialis-tische, dan de democratische en tot slot de progressieve kant?"

Dr wördt ieverig eknekt!

"En dan ek...!" zæg klein Derkien. De burgemeester versköt. "Natuurlijk," zæg ie en i'j kreg een rood eufd.

Jaansn, die 't zo greeg wil, mag as eerste 't woord, i'j get dr zelfs bi'j stoan. Met vule bombaerie aelt ie een ontwærp uut zien map. 't grote grune vlak springt metiene noar veurn. "Kiek," zæg ie, "wi'j as christelijke pertije willn greeg een grune vlage. Ons dörp leg zo prachtig in de weilaandn, ie muun 't as "symboliek" zien."

"Die drie oranje stærrn..., bin ie dat met oe drieën?" löt rooie Gæjt um spitsvondig ontvaaln.

Van de veralderierdeid get Jaansn zittn en ef inies gien sproakwaeter meer.

De burgemeester knekt ies en vrög an Bærteld: "Mag ik dan nu de socialistische inbrenge?"

Bærteld ef zien ontwærp al umgekiert op toafel lengn. I'j blef zittn. Wat stoeknd begint ie te vertelln. "Wi'j ebbn een... eh... rooie vlage in de gedachtn..." Dan aepert ie weer. Metiene draeit ie 't blad umme. Alle eufdn buugn veurover umme te kiekn. Kees Knevel spuult de balle weerumme.

"Die drie blauwe bluumpies, bin ie dat met mekaere... Bin dat gien vergeetnienieties?"

De drie linksn willn al in de bienn koomn umme te protesteern, maer de veurzitter sust: "Orde heren...!"

De democraatn bin an de beurte. Frederik skraept en zien keel en frunnikt an zien strek, ook zien als skoert eftig in de boord van zien kiel. I'j kump drekt met de teekngge op toafel.

"Wi'j viendn dat onze gemientevlage blauw muut wörn, net as de wied'eid van de blauwe lucht woor as wi'j in leevn. Binnin muun gien steerns en gien bloemn koomn, maer een

ofbeeldige van een febriek, per slot van reekngne ef de industrie onze plaese welvoort ebracht."

"Doe'j op die febriek dan ook een skörstien met vieze rookwolkn?" springt Jan Burgers dr metiene op, "dan ku'j beter metiene een zwærte vlage ontwærpn!"

"Heren... heren toch..." Weer de burgemeester.

Peter Köster nemp 't woord al veurdat ie 't kreg.

"Onze vlage muut niet gruen, niet rood, niet blauw maer, geel wörn," sprek ie met ienige stemvereffige, "en over 't iele vlak muun zwærte stippn koomn as waerskouwige veur ons allemoale, dat as wi'j zo deurgoan, de zunne op de duur ielemoale verduustert!"

I'j apt eevn noar oasem en dat gef de aandern de geleegngne umme te goan discussiëren, now ja... 't is meer een geskroew deur mekaere en de woordn rood... gruen... geel... blauw... voern de boovntoon.



Dan get Dirk stoan. I'j stek, zelfs now as ie stet, maer een klein stukkien boovn zien mederoadsleedn uut, die allemoale zittn. Toch gef 't een bepaald overwicht, zie oln eur temeinsn allemoale stille. Ook de publieke tribune öldt de oasem in.

"Veurzitter, maag ek now eevn?" vrög ie netties. Deze knekt en met zien aand wes ie noar Dirk.

"Ie vergeetn met mekaere wel ies dat ek... dr ook nog bin," wes ie iederiene fijnzinnig teræchte, "maer ek eb ook nog een ideegien." Met kleine stæppies löp ie noar de aandere kaante in de roadszael woor as een flapover stet. Uut zien broekzak aelt ie een viltstifte. Met een paer aeln tekent ie een

lengnde ræchtoek. Van de punte linksboovnan trækt ie een lijn noar ræchtsonderan. Dan begint ie ræchtsboovn en trækt een streep noar linksonder. Middnin maekt ie een cirkeltien, dat ie met de stifte ielemoale inkleurt.

"Kiek," zæg ie. "zo e'k onze gemiente verdielt in vier vlakkn en een rundtien. De vlakkn boovnan en onderan bin wat groterder dan de linker en de ræchter. 't Boovnstes vlak wo'k rood maekn, 't onderste gruun, 't linker geel en 't ræchter blauw."

't Is eevn stille in de roadszael, dan vrög de burgemeester: "En die cirkel dan, wat heeft die voor kleur?"

Klein Derkien kek de veurzitter onbevangan an.

"Ek wol 't rundtien een onbestemde kleur geevn, as wi'j de opdracht now ies geevn umme wat rood, gruun, blauw en geel deur mekaere te doen, wat zol dat veur kleur wörn?

Een dörpsblangnkleur?"

Iederiene is stille en kek wat beskaemd veur um en opies wördt ook punt neegn een aemerstuk.

Een alf joor laeter is de inwijdige, of beter ezægd... de ontplooi'ige. 't iele dörp is uut'eloopt as de eerste burger, met van alle fracties een ofgevaardigde, de vlage zal ijsn an de vlagepoale veur 't stadius.

De meinsn drongn umme maer neks te missn.

En dan opies wappert ie... wappert ie voluut! 't Blauw, gruun, geel en rood blekkert in de zonne... maer dat rundtien binnin! 't Ef inderdoad een vremde kleur. 't Is gien broen, 't is gien poars...

Klein Derkien muut zien eufd achter in zien nække laegn um 't te zien. I'j knekt ies een keer. Soms skient 't uut een

gruunn, soms kump dr wat rosig deur, dan is 't weer blauw-griezig en as de zonne dr'op skient, lecht 't geel op... net zoas de bedoelige was!

Weer knekt ie..., dat cirkeltien..., dat cirkeltien öldt toch maer mooi alles bi'j mekaere!

Riek van der Wulp -Genemuiden-